

Gij Cienzgangj Gvendaengz Luzcuh Bozbwz

□ Moz Beibei comz hoiz



▲《Luzcuh Cienzgeiz》cùt heiq caijcaz laeng baihnanz Gvangjsih.

Cienzgangj Luzcuh singq Liengz, ranzmbanj de dwg seizneix Bozbwz Yen Sanghfung Yangh Bingzsanh Cunh Mbanjluzloz, de coengmingz gyaunde, rox diuqfoux ciengqgo, lij rox raiz sei boq dig.

Gwn Va'ngaeux Seng Lwg

Riuznaeuz mwh Nijvah aeu rin bouj mbwn, mbouj haeusim hawj di rin soiq doek daengz Mbanjluzloz, couh baenz aen gumz ndeu, doeklaeng caiq bienqbaenz aen cingj he. Aenvih ndawcingj maj miz va'ngaeux, ndigah heuhguh Cingja'ngaeux.

Seizde ndawmbanj miz ranz he singq Liengz, mehyah 50 lai bi lo, lij caengz miz lwg. Miz haemh ndeu, yah de fangzhwnz raen dahsien naeuz, gwn gij va'ngaeux aen Cingja'ngaeux couh ndaej miz lwg. Song gvanbaz neix buenq saenq buenq ngeiz, couh bae mbaet va'ngaeux ma gwn. Mbouj geij nanz, yah de couh roxyinh aen dungx yiengjihu lumj byajraez nei, yienghneix couh mizndang lo.

Doeklaeng yah de seng le dah lwg ndeu, song gvanbaz gyaenz dahlwg neix lumj gyaenz aencaw nei, an coh de guh Liengz Luzcuh.

Ngaiz Ep Guh Yahnoix

Cinciuz Daigangh nienz, Siz Cungz gvaq Bozbwz, raen Luzcuh baenzneix gyaunde, yaek aeu bak daeuj cawdongq coux de guh yahnoix. Coux Luzcuh ngoenzde, aen mbwn fwjndaem fwjbumz, Siz Cungz daiq vunz daeuj daengz Mbanjluzloz. Luzcuh gaenq hwnj ndoi bae ndoj lo, hoeng ndoj bae ndoj dauq, doeklaeng cix deng Siz Cungz gaemhdawz lo.

Mwh doxbiek, Luzcuh caeuq vunzmbanj gangj: "Ngoenzneix gou bae lo, hoeng aensim gou lij caeuq aen sou doxnem, gou dai hix aeu bienq guh duzhag mbin dauq ranzmbanj, mboujguenj dailix cungj dwg vunz Nanzliuz!"

Miz ngoenz he, Siz Cungz naeuz: "Mwngz gyangngoengz gwn huq ndei, gyanghaemh ninz rug gim, gou doiq mwngz baenzneix ndei, mwngz vihmaz

mbouj simhai saekdi ne?" Luzcuh rox mbouj ndaej buetdeuz daengz gizwnq bae lo, ngeix le yaep ndeu han naeuz: "Gou couhwdg gig niemh ranzmbanj gou. Yaek hawj gou simhai najriu, aeu laeb aen laeuz sang miz fanh ciengh, hawj gou ndaej hwnzngoengz muengh coh ranzmbanj." Siz Cungz dingq le naeuz: "Gij saeh iqetet neix, vihmaz mbouj caeuxdi naeuz gou nyi?"

Doeklaeng Siz Cungz couh hwnj le aen "Laeuzginhguj". Aen laeuz neix moix caengz cungj mbouj doxdoengz, sangsetset daengj haeuj gwnz mbwn bae, benqfwj heuxgeuj ledled, aen cueng hai coh baihnanz, ndaej muengh daengz giz gyaenz yaeng'yaeng baihnanz.

Hoenz Bienq Duzhag Dauq

Luzcuh maj ndaej gyaenz, lajbiengz cungj rox caez, byawz rox gingqyienz cauxhux lo. Seizde Cauvangz Swhmaj Lunz miz boux cienggun heuhguh Sunh Siu, dingqgangj Luzcuh boux yahnoix Siz Cungz gyaunde caemhcai dungxcaiz rimrd, couh heuh Siz Cungz aeu Luzcuh, Siz Cungz mbouj hawj.

Sunh Siu hozgaek dangqmaz, couh gangj gij vah mbouj ndei Siz Cungz hawj Swhmaj Lunz nyi, Swhmaj Lunz couh laihaeuz Siz Cungz mbouj cungsim, doengzeiq de daiq bing bae humx Laeuzginhguj. Siz Cungz rox le doiq Luzcuh naeuz: "Ngoenzneix gou vih mwngz daekcoih bouxmizgienz lo." Luzcuh doq daej doq gangj: "Gou nyienh doq dai youq dangqnaiz mwngz!" Gangj sat de raiz souj sei ndeu, duet buhsei, dai laeuz sang diuq roengzbae dai lo. Caenh raen raq rumz ndeu ci gvaqdaej, Luzcuh bienqbaenz duzhag ndeu, mbin coh baihnanz bae.

Duzhag mbin dauq ranzmbanj, hwnzngoengz daejaa. Bohmeh Luzcuh cix loqraen dahlwg daengx ndang lengh lwed dauqma. Vunzmbanj ngeix daengz gij vah Luzcuh, couh vix duzhag naeuz: "Neix couhwdg Luzcuh!" Caiq laeb miuh bae geiqniemh de, gaij coh diuz dah baihnaj Miuhluzcuh guh Dahluzcuh. Dingj Lingjswngnij miz ndaek rinvaighangh hungloet ndeu, cienzgangj dwg duzhag mbin dauq le youq gizneix dingz din yietnaiq, doeklaeng vunzmbanj heuh ndaek rin neix guh "Rinluzcuh".



▲ Mingzciuz doz-siengq Luzcuh.



▲《Mbaw Doz Yenzginhguj》Cingciuz



▲ Mbaw doz 《Luzcuh Doek Laeuz》.



▲《Yenzginhguj》Mingzciuz.



▲ Bozbwz Yen laeb aen diuhsieng Luzcuh.